



JUDICIAL SYSTEM MONITORING PROGRAMME

PROGRAMA MONITORIZASAUN SISTEMA JUDISIAL

Komunikadu Imprensa

12 Jullu 2013

JSMP Louva Komisaun A no C Parlamentu Nasionál nia esforsu ba Alterasaun Lei Nú. 17/2011

Komisaun A no C Parlamentu Nasionál diskuti no altera Lei Númeru 17/2011 kona-ba Rejime Jurídiku ba Brankeamentu Kapitais no Finansiamentu ba Terorismu. Pleanaria ne'e halo durante loron 4 nia laran, hahu husi 3-6 Jullu 2013, iha Tibar, Distritu Liquica. Diskusaun ba alterasaun ne'e involve autóridade no instituisaun relevante hosi Banku Sentral, Komisaun Anti Korrupsaun, Prokuradór Jerál no Inspetór Jerál.

“Ami apresia tebes Parlamentu Nasionál ninia esforsu hodi involve institusaun relevantes sira iha prosesu ne'e. Prátika hanesan ne'e importante teb-tebes hodi asigura katak kestaun prinsipal sira relasiona krime fase osan no finansiamentu terorismu ne'ebé konsidera hanesan krime trans-nasionál, tenke trata ho rigorozu, tanbá krime hirak ne'e ho rede ne'ebé organizadu no iha risku bo'ot ba nasaun barak,” dehan Diretór Ezekutivu JSMP Luis de Oliveira Sampaio.

JSMP haksolok ho vontade polítika Parlamentu Nasionál ne'ebé involve instituisaun relevantes ne'ebé sei implementa lei ne'e iha futuro. Diskusaun ne'e espesifiku ba alterasaun, aditamentu no revogasaun liu-liu ba kriasaun Unidade ba Informasaun no Finanseiru (UIF).

Aleinde ne'e iha proposta alterasaun ba artigu 5^o ho 6^o espesifikamente propoin atu altera artigu 133^o Kódigu Penál kona-ba Finansiamentu ba Terorismu no artigu 313^o Kódigu Penál kona-ba Brankeamentu Kapitais, tanba artigu rua ne'e la releta realidade no natureza atual.

Alterasaun ne'e mos inklui proposta revizaun atu hamosu provisaun ida tan kona-ba krime pirateria (*pembajakan*) ba iha Kódigu Penál. Proposta ne'e bazeia ba observasaun orador sira tuir rekomendasaun *Grupo de Acção Financeira Internacional (GAFI)* relasiona ho Identifikasaun Krimes Brankeamentu Kapitais.

Orador sira ne'ebé kontribui iha diskusaun ne'e mak Prezidente no Diretór Jerál Banku Sentral Timor Leste, Abrão Vasconcelhos, Adjunta Prokuradór Jerál da República, Dra. Zelia Trindade inklui pontu vokal Ministeriú Públiku kona-ba Krime Brankeamentu Kapitais, Dr. Viçente Bríto, Adjuntu Komisaun Anti Korrupsaun (KAK), José António de Jesus das Neves, no Inspetór Jerál Francisco de Carvalho nomos representante husi Ministériu Finansas.

Atu hetan informasaun kompleitu favor bele kontaktu direktamente ba:

Luis de Oliveira Sampaio

Diretór Ezekutivu JSMP

Diresaun e-mail: luis@jsmp.minihub.org

info@jsmp.minihub.org

Telefone: 3323883 | 77295795

Website: www.jsmp.tl

Facebook: www.facebook.com/timorleste.jsmp

Twitter: @JSMPTl